

清

史

稿

清史稿

列傳二百三十一

黃體芳

字紀安

宗室寶廷

宗室盛昱

張佩綸

字如璣

鄧承修

徐致祥

黃體芳字漱蘭浙江瑞安人同治二年進士選庶吉士授編修日探討掌故慨然有經世志累遷侍讀學士頻上書言時政得失晉豫飢請籌急賑整吏治清庶獄稱旨時議禁燒鍋裕民食戶部覈駁體芳謂燒鍋領帖部獲歲銀三萬因上董恂奸邪狀坐鐫級光緒五年三月惠陵禮成主事吳可讀爲定大統以尸諫詔言同治十三年十二月初五日降旨嗣後皇帝生有皇子即承繼大行皇帝爲嗣吳可讀所奏前旨卽是此意於是下羣臣議體芳略言卽是此意一語止有恪遵更有何議迺激烈者盛氣力爭巽畏者囁嚅不吐或忠或謹皆人臣盛節而惜其未明今日事勢也譬諸士民之家長子次子各有孫而自祖父母視之則無異然襲爵職必歸之長房者嫡長與嫡次之別也又如大宗無子次

宗止一嫡子然小宗以嫡子繼大宗不聞有所吝者以仍得兼承本宗故也唯君與民微有不同民間以嫡子繼大宗則大宗爲主本宗爲兼天潢以嫡子繼帝系則帝系爲主本宗可得而兼親不可得而兼若人君以嫡子繼長支則固以繼長支爲主而本宗亦不能不兼蓋人君無小宗即稱謂加以區別亦於本宗恩義無傷此兩宮意在嗣子承統慈愛穆宗亦即所以慈愛皇上之說也今非合兩統爲一統以不定爲豫定就將來承繼者以爲承嗣似亦無策以處之矣試思此時即不專爲穆宗計既正名爲先帝嗣子豈有僅封一王貝勒者乎卽不專爲皇上計古來天子之嗣子豈有以不主神器之諸皇子當之者乎卽僅爲穆宗計皇上可如民間出繼之子乎卽僅爲皇上計穆宗可如前明稱爲皇伯考乎夫奉祖訓稟懿旨體聖意非僭先帝今上皆無不宜非悖明其統而非其人非擅論統系辨宗法正足見國家億萬年無疆之庥非干犯忌諱此固無意氣可逞亦無功罪可言也疏入詔存毓慶宮自是劾尙書賀壽慈節奏俄使崇厚誤國洪鈞譯地圖舛謬美使崔國英赴賽會失體皆人所難言直聲震

中外七年遷內閣學士督江蘇學政明年授兵部左侍郎中法事起建索還琉球經畫越南議十一年還京劾李鴻章治兵無效請敕曾紀澤過歸練師忤旨左遷通政使兩署左副都御史奏言自強之本在內治又歷陳中外交涉得失後卒如所言十七年乞休二十五年卒子紹箕紹第並能承家學而紹箕尤瞻雅紹箕字仲弢光緒六年進士以編修典試湖北曾侍講擢庶子京師立大學堂充總辦究心東西邦學制手訂章條遷侍讀學士歷充編書局譯書局監督出爲湖北提學使東渡日本與其邦人士論孔教輒心折歸未幾卒

宗室寶廷字竹坡隸滿洲鎮藍旗鄭獻親王濟爾哈朗八世孫同治七年進士選庶吉士授編修累遷侍讀光緒改元疏請選師保以崇聖德嚴官寺以杜干預覈實內務府以節糜費訓練神機營以備緩急懿旨嘉納大考三等降中允尋授司業是時朝廷方銳意求治詔詢吏治民生用人行政寶廷力抉其弊謬譌數百言至切直晉豫飢應詔陳言請罪己并責臣工條上救荒四事曰察釐稅開糧捐購洋米增糶局復以災廣賑劇請行分貸法畿輔旱日色赤市言訛

誠建議內殿防範外示鎮定以安人心歷遷侍講學士以六事進曰明黜陟專責任詳考勸嚴程限去欺蒙慎赦宥稱旨五年轉侍讀學士初德宗繼統嗣文宗懿旨謂將來生有皇子即繼穆宗爲嗣內閣侍讀學士廣安請頒鐵券被訶責至是穆宗奉安惠陵主事吳可讀堅請爲其立後以尸諫下廷臣議寶廷謂恭繹懿旨之意蓋言穆宗未有儲貳即以皇上所生之子爲嗣非言生皇子即時承繼也言嗣而統赅焉矣引伸之蓋言將來即以皇上傳統之皇子繼穆宗爲嗣也因皇上甫承大統故渾涵其詞留待親政日自下明詔此皇太后不忍歧視之慈心欲以孝弟仁讓之休歸之皇上也廣安不能喻故生爭於前吳可讀不能喻故死爭於後竊痛可讀殉死之忠誠又惜其遺摺之言不盡意也可讀未喻懿旨言外之意而其遺摺未達之意皇太后早鑒及之故曰前降旨時卽是此意也而可讀猶以忠佞不齊爲慮誠過慮也宋太宗背杜太后明景帝廢太子見深雖因佞臣妄進邪說究由二君有自私之心迺者兩宮懿旨懸於上孤臣遺疏存於下傳之九州載之國史皇上天生聖人必能以皇太后之心

爲心請將前後懿旨恭呈御覽明降諭旨宣示中外俾天下後世咸知我皇太后至慈皇上至孝至弟至仁至讓且以見穆宗至聖至明付託得人也如是則綱紀正名分定天理順人情安矣因赴內閣集議意微不合謹以上聞又奏廷臣謂穆宗繼統之議已貶於皇太后前降懿旨之中將來神器所歸皇上自能斟酌盡善固也然懿旨意深詞簡不及此引伸明哲異日皇上生有皇子將繼穆宗爲嗣乎抑不即繼乎不即繼似違懿旨即繼又嫌疑近建儲就令僅言繼嗣不標繼統之名而臣民亦隱以儲貳視之是不建之建也而此皇子賢也固宗社福如其不賢將來仍傳繼統乎抑舍而別傳乎別傳之皇子仍繼穆宗爲嗣乎抑不繼乎即使仍繼穆宗是亦不廢立之廢立也豈太平盛事乎至此時即欲皇上斟酌盡善不亦難乎廷議之意或以皇上親政皇子應尙未生不難豫酌一盡善之規然國君十五而生子皇子誕育如在徹簾之前又何以處之乎與其留此兩難之局以待皇上何如及今斟酌盡善乎且懿旨非皇上可改此時不引伸明哲將來皇上雖斟酌盡善何敢自爲變通乎此未妥者一也廷

議又謂繼統與建儲文義似殊而事體則一似也然列聖垂訓原言嗣統之常今則事屬創局可讀意在存穆宗之統與無故擅請建儲者有閒文義之殊不待言矣今廷議不分別詞意漫謂我朝家法未能深知則日前懿旨即是此意之謂何臣民不更滋疑乎此未妥者又一也疏入詔藏毓慶宮其他俄使來議約朝鮮請通商均有所獻納七年授內閣學士出典福建鄉試既蒞事還朝以在途納妾自劾罷築室西山往居之是冬皇太后萬壽祝嘏賞三品秩十六年卒子壽富庶吉士庚子拳匪亂殉難自有傳

宗室盛昱字伯熙隸滿洲鑲白旗肅武親王豪格七世孫祖敬徵協辦大學士父恆恩左副都御史盛昱少慧十歲時作詩用特勤字據唐闕特勤碑證新唐書突厥純特勤爲特勤之誤絲是顯名光緒二年進士既授編修益厲學討淵經史輿地及本朝掌故皆能詳其沿革累遷右庶子充日講起居注官閩浙總督何璟巡撫劉秉璋收降台匪黃金滿盛昱劾璟等長惡養奸請下吏嚴議發金滿黑龍江新疆安置尙書彭玉麟數辭官不受職劾其自便身圖效功臣驕

蹇之漸浙江按察使陳寶箴陞見未行追論官河南聽獄不慎罷免佩綸劾其留京干進寶箴疏辯盛昱言其嘵嘵失大臣體請再下吏議朝鮮之亂也提督吳長慶奉北洋大臣張樹聲檄率師入朝執大院君李埈應以歸時詫爲奇勳盛昱言出自誘刦不足言功徒令屬國寒心友邦騰笑宜嚴予處分俾中外知非朝廷本意爲講官未半載數言事士論推爲謇諤十年遷祭酒法越構釁徐延旭唐炯坐失地逮問盛昱言逮問疆臣而不明降諭旨二百年來無此政體并劾樞臣怠職太后怒罷恭親王奕訢等而詔醇親王奕譞入樞府盛昱復言醇親王分地綦崇不宜嬰以政務其夏命廷臣會議和戰大局盛昱主速戰力陳七利謂再失事機噬臍無及盛昱爲祭酒與司業治麟究心教士之法大治學舍加膏火定積分日程懲游惰獎樸學士習爲之一變十四年典試山東明年引疾歸盛昱家居有清譽承學之士以得接言論風采爲幸二十五年卒張佩綸字幼樵直隸豐潤人父印塘官安徽按察使卒於軍佩綸成同治十年進士以編修大考擢侍講充日講起居注官時外侮亟累疏陳經國大政請敕

新疆東三省臺灣戢戒備杜日俄窺伺晉豫飢饉輸旱迺引祖宗成訓請上下
交儆條四目以進曰誠祈曰集議曰恤民曰省刑恭親王奕訢遭議構復請責
王竭誠負重上嘉納之通政使黃體芳繼陳災狀語稍激絀吏議佩綸力爭被
宥尋丁憂服竟起故官時琉球已亡法圖越南亟佩綸曰亡琉球則朝鮮可危
棄越南則緬甸必失因請建置南北海防設水師四大鎮又薦道員徐延旭唐
炯知兵堪任邊事並招致劉永福黑旗兵爲己用是時吳大澂陳寶琛好論時
政與寶廷鄧承修輩號清流黨而佩綸尤以糾彈大臣著一時如侍郎賀壽慈
尙書萬青藜董恂皆被劾去光緒八年雲南報銷案起王文韶以樞臣掌戶部
臺諫爭上其受賕狀上方意任隆密迺援乾隆朝梁詩正還家侍父事請令引
嫌乞養不報又兩疏劾之遂罷文韶而擢佩綸署左副都御史督侍講學士明
年法越構衅佩綸章十數上朝廷始遣兵征土寇綴敵勢法人不便其所爲佯
議和而陰使人攻陷南定佩綸請乘法兵未集敕粵督遣水師護越都而樞臣
狃和局慮佩綸梗議令往陝西按事已而法果襲順化脅越與盟越事益壞使

歸命在總理各國事務衙門行走十年法人聲內犯佩綸謂越難未已黑旗猶存萬無分兵東來理請毋罷成敗戎心上睦之詔就鴻章議遂決戰令以三品卿銜會辦福建海疆事佩綸至船廠環十一樓自衛各管帶白非計斥之法艦集戰書至衆聞警謁佩綸亟請備仍叱出比見法艦升火始大怖遣學生魏瀚往乞緩未至而礮聲作所部五營潰其三營殲焉佩綸遁鼓山麓鄉人拒之曰我會辦大臣也拒如初翼日逃至彭田鄉猶飾詞入告朝旨發帑犒之命兼給政餉聞馬尾敗止奪卿銜下吏議閩人憤甚於是編修潘炳年給事中萬培因等先後上其罪狀時已坐薦唐炯徐延旭褫職至是再論成居邊釋還鴻章再延入幕以女妻之甲午戰事起御史端良劾其干預公事命逐回籍庚子議和鴻章薦其諳交涉詔以編修佐辦和約既成擢四五品京堂稱疾不出三十四年卒何如璋字子錢籍廣東大埔同治七年進士選庶吉士授編修以侍讀出使日本歸授少詹事出督船政承鴻章旨和議敵至猶嚴諭各艦毋妄動及敗藉口押銀出奔所如勿納不得已往就佩綸彭田鄉佩綸慮敵蹤跡及之給

如璋出士論謂閩事之壞佩綸爲罪魁如璋次之如璋亦遣戍後卒於家

鄧承修字鐵香廣東歸善人舉咸豐十一年鄉試入貲爲郎分刑部轉御史遭憂歸光緒初服闋起故官與張佩綸等主持清議多彈擊號曰鐵漢先後疏論閩姓賭捐大乖政體關稅侵蝕嬰害庫帑以考場積弊陳七事糾正之吏治積弊陳八事肅澄之又劾總督李瀚章失政左副都御史崇勳無行侍郎長敘等違制學政吳寶鋆葉大焯布政使方大湜龔易圖鹽運使周星譽諸不職狀會邊警糾彈舉朝慢弛請召還左宗棠柄國政逾歲彗星見則又言宗棠莅事數月未見設施而因推及寶鋆王文韶之昏眊請罷斥回天意是時文韶方嚮用權任轉重會雲南報銷案起又嚴劾之仍不允久之遷給事中時朝鮮亂平琉球案未結上言簡知兵大臣駐烟臺厚集南北洋戰艦番巡留吳長慶軍戎朝互犄角越南亂作法人襲順化復請詔百官廷議定國是皆不報十年越事益壞首劾徐延旭唐炯失地喪師趙沃黃桂蘭擁兵偵事宜肅國憲其夏法人願媾和承修聯合臺諫上書極言和議難恃旋與司業潘衍桐密上問敵五策並

劾李鴻章定和之疏嫉劉永福敢戰言之憤絕亡何法果敗盟侵臺灣難籠樞臣議和戰未決於是承修再陳三策法所恃爲援者西京東貢我若師分三路亟攻越南彼將自救不暇策之上也分兵爲守敵至則戰敵退不追老師糜餽利害共之策之中也若慮餽誦運阻不敢言戰則其禍不勝言矣是謂無策補鴻臚寺卿充總理各國事務大臣自此陳說兵事章凡十三上多見採納嗣以中允樊恭煦獲譴上疏營救坐鐫秩明年赴天津佐鴻章與法使巴特納商和約定新約十款還乞歸省未出都命赴廣西與法使會勘中越分界至則單騎出關會法使浦理變浦理變欲先勘原界承修據約先欲改正界限不相下乃陽以文淵保樂海甯歸我而陰電其駐京使臣詆承修違約爭執謂非先勘原界勢將能議朝廷不獲已許之承修遂有三難二害之電奏略言附界居民不願隸法先勘原界慮滋事變難一保樂牧馬游勇曠盛道路梗阻難二原界碑折十有存五巉岡聳獻瘴雨炎翳人馬不前難三且原界既勘彼必颺去新界奚論駢疆文淵俱不可得閉門失險戰守兩難害一文淵既失北無寸地關內

通商勢將迫脅越既不存粵將焉保害二疏入不省十二年法人別遣狄隆狄塞爾來會適法官達魯倪思海至者蘭爲越人擊殺狄使懼又恥而諱其事堅請按圖畫界朝旨報可於是首議江平黃竹白龍尾各地割隸越承修指圖籍抗爭狄使不能屈欲分白龍尾半之左歸我而右歸越承修以其地爲欽海外戶法得之則內偏防城外斷東興思勒是無欽廉也議久之暫與定約三條猶未決而狄使竟以兵力驅江平黃竹居民內徙朝廷慮啟邊衅命先勘欽西至桂省全界承修遂與訂定清約語詳邦交志十三年具約本末以上復官十四年謝病歸主講豐湖書院讀書養母十七年卒於惠州

徐致祥字季和江蘇嘉定人咸豐十年進士選庶吉士授編修晉中允典試山東累遷內閣學士督順天學政遭憂去服闋起故官光緒十年法越構兵德璉琳以和議進朝旨未決致祥上三策謂決戰宜速任將宜專軍勢宜聯閩事棘言何璟張兆棟無幹濟才而薦楊岳斌張佩綸堪重任頗嘉納時議築鐵路致祥聞而惡之痛陳八害並請力闢邪說亟修河工上責其誕妄鐫三級越二年

鐵路議再起又再阻止之先後封事十數上而惓惓於抑奄寺治河工爲時論所美歷典福建廣東鄉試十八年授大理寺卿連劾樞臣禮親王世鐸山西巡撫阿克達春而糾彈張之洞尤不遺餘力尋命視學浙江有嚴名中日之役我師敗績上奕劻李鴻章誤國狀請逮葉志超衛汝貴等寘之法而畀馮子材劉永福以征討名號庶可振國威作士氣會山東教案起德使海靖勒罷李秉衡職致祥曰昔歲罷劉秉璋今茲罷李秉衡是朝廷黜陟之大權操之敵人也爲請顧全國體毋恤敵私念國是不振亂未有已迺援引聖祖篤信朱子垂爲家法往事請舉行經筵以輔聖德皆不報秩滿還朝遷兵部右侍郎二十四年上違豫衆情驚疑復以輔導君德之說進是時國家多故聖嗣尙虛致祥爲重國本計略言昔宋眞宗取宗室子養之宮中逮仁宗既生即遣歸邸厥後仁宗高宗理宗皆踵行之有子而遺養子歸邸者眞宗是也無子而即以養子傳授神器者仁宗之於英宗高宗之於孝宗理宗之於度宗是也今以宗社繫託之重臣民屬望之切深維至計取則前朝慎選近支宗室兄弟之子數人擇親擇賢

入侍禁中止以爲子不以爲儲恪遵家法既可默察其賢否徐以俟皇子之生則皇上未有子而有子皇太后未有孫而有孫而穆宗付託之大業亦繼承有屬矣迺未幾果有立溥儀爲大阿哥事二十五年卒

論曰體芳寶廷佩綸與張之洞時稱翰林四諫有大政事必具疏論是非與同時好言事者又號清流黨然體芳寶廷議承大統惓惓忠愛非佩綸等所能及也承脩以搏擊爲能致祥以誕妄受責君子譏之唯盛昱言不妄發潔身早退庶超然無負清譽歟

清史稿

列傳二百三十二

吳可讀

續敦復

朱一新

屠仁守

員典選

何金壽

安維峻

文悌

江春霖

吳可讀字柳堂甘肅皋蘭人初以舉人官伏羌訓導道光三十年成進士授刑部主事晉員外郎遭變去主講蘭山書院會撤拉番騷動被命佐團練服闋起故官遷吏部郎中轉御史各國使臣請覲議禮久未決可讀請免拜跪時論睦之烏魯木齊提督成祿誣民爲逆擊殺多人虛飾勝狀爲左宗棠所劾可讀繼陳其罪有可斬者十不可緩者五尋逮問獄上諭斬廷臣請改監候可讀憤甚復疏爭請斬成祿以謝甘民再斬臣以謝成祿語過懇直被訶責鐫三級歸復掌教蘭山踰年穆宗崩德宗續業起吏部主事五年穆宗奉安惠陵自請隨赴襄禮還次薊州宿廢寺自縊未絕仰藥死於懷中得遺疏則請爲穆宗立嗣也其言曰罪臣聞治不諱亂安不忘危危亂而可諱忘則進苦口於堯舜爲無疾

呻吟陳隱患於聖明爲不祥舉動罪臣前因言事獲譴蒙我先皇帝曲賜矜全
免臣以斬而死以囚而死以傳訊觸忌而死犯三死而未死不求生而再生則
今日罪臣未盡之餘年皆我先皇帝數年前所賜也欽奉兩宮皇太后懿旨以
醇親王之子承繼文宗顯皇帝爲子入承大統爲嗣皇帝俟嗣皇帝生有皇子
即承繼大行皇帝爲嗣我皇上仁孝性成承我兩宮皇太后授以寶位將來千
秋萬歲時必能以我兩宮皇太后今日之心爲心而在廷之忠佞不齊即衆論
之異同不一以宋初宰相趙普之賢而猶首背杜太后以明大學士王直之爲
舊臣而猶以黃玠請立景帝太子一疏不出我輩爲愧賢者如此遑問不肖舊
人如此奚責新進名位已定者如此況在未定惟有仰求我兩宮皇太后再降
諭旨將來大統仍歸大行皇帝嗣子嗣皇帝雖百斯男中外臣工均不得以異
言進如此則猶是本朝子以傳子之家法而我大行皇帝未有子而有子即我
兩宮皇太后未有孫而有孫異日繩繩揖揖相引於萬代者皆我兩宮皇太后
所自出而不可移易者也彼時罪臣即欲有言繼思降調不得越職言事今逢

我大行皇帝奉安山陵恐積久漸忘則罪臣昔日所留以有待者今則迫不及待矣謹以我先皇帝所賜餘年爲我先皇帝上乞數行懿旨惟望我兩宮皇太后我皇上憐其哀鳴勿以爲無疾呻吟不祥舉動則罪臣雖死無憾尤願我兩宮皇太后我皇上體聖祖世宗之心調劑寬猛養忠厚和平之福任用老成母雪外國之所獨爭爲中華留不盡母創祖宗之所未創爲子孫留有餘罪臣言畢於斯命畢於斯謹以大統所繫上聞吏部奏諸朝詔憫其忠予優卹下羣臣議遂定以繼德宗之統爲穆宗之子無異論可讀臨歿遺書與其子之桓謂出薊州一步卽非死所之桓遂成其遺志葬薊州都人卽所居城南舊宅祠祀之有潘敦儼者字清畏籍江甯總督鐸子以任子官工部郎中遷御史默念穆宗嗣統未有定議孝哲毅皇后又仰藥殉遂疏請表揚穆后潛德更設號並解醇親王奕譞職任詔嚴斥奪職歸隱於酒閤二十餘年卒

朱一新字蓉生浙江義烏人鄉舉對策語觸時忌主司李文田特拔之入貲爲內閣中書光緒二年成進士選庶吉士授編修法越事起數上書主戰又嘗畫

海防策語至切要典湖北鄉試稱得士十一年轉御史連上封事言論侃侃不避貴戚內侍李蓮英漸著聲勢逾歲醇親王奕譞閱海軍蓮英從一新憂之而適值山東患河燕晉蜀閩患水遂以遇災修省爲言略曰我朝家法嚴馭宦寺世祖宮中立鐵牌更億萬年昭爲法守聖母垂簾安得海假采辦出京立寅重典皇上登極張得喜等情罪尤重謫配爲奴是以綱紀肅然罔敢恣肆迺今夏巡閱海軍之役太監李蓮英隨至天津道路譁傳士庶駭愕意深宮或別有不得已苦衷匪外廷所能喻然宗藩至戚閱軍大典而令刑餘之輩廁乎其間其將何以詰戎兵崇體制況作法於涼其弊猶貪唐之監軍豈其本意積漸者然也聖朝法制修明萬無慮此而涓涓弗塞流弊難言杜漸防微亦宜垂意從古閹宦巧於逢迎而昧於大義引援黨類播弄語言使宮闈之內疑貳漸生而彼得售其小忠小信之爲以陰竊夫作福作威之柄我皇太后皇上明目達聰豈有跬步之地而或敢售其欺順事每忽於細微情易溺於近習侍御僕從罔非正人辨之宜早辨也疏上太后怒詰責疏言苦衷何指一新曰臣所謂不得已

苦衷者意以親藩遠涉內侍隨行藉以示體恤昭慎重也顧在朝廷爲曲體在臣庶則爲創見風聞北洋大臣以座船迎醇親王王弗受而太監隨乘之至賊人觀聽一不謹慎流弊遂已至斯臣所爲不能已於言也詔切責降主事乞終養歸張之洞督粵建廣雅書院延爲主講一新博極羣書洞知兩漢及宋明諸儒家法務通經以致用諸生有聰穎尙新奇者必導而返諸篤實正大語具所箸無邪堂答問中卒年四十有九

屠仁守字梅君湖北孝感人同治十三年進士選庶吉士授編修光緒中轉御史時政出多門仁守因天變請修政治條上六事曰杜諉卸開壅蔽慎動作抑近習軫民瘼重國計而歸本於大公至正徹天勸民疏上不省又以海軍報効雜進無次僥倖日多仁守痛陳五弊資敘不計弊一名器冒濫弊二勸懲倒置弊三求益得損財計轉虧弊四馴僉朋侵莫可究詰弊五五弊既滋適生三患患病民患妨賢患隳紀綱法度特以自海軍衙門達之奉懿旨行之毋或敢貿然入告遂使謗騰衢路而朝廷不聞患伏隱微而朝廷不知羣小得志寵賂滋

張若不停止即承平無事猶或召亂況時局孔艱乎疏入詔從之權貴益側目十五年太后歸政仁守慮僉人譏搆兩宮易生嫌隙疏請依高宗訓政往事凡部院題本尋常奏事如常例外省密摺廷臣封奏仍書皇太后皇上聖鑒俟慈覽後施行並請太后居慈甯宮節游觀詔賡責革職永不敘用既歸主講山西令德堂二十六年兩宮西狩起用五品京堂授光祿寺少卿尋卒吳兆泰字星階籍麻城與仁守友善互相厲以道義光緒二年進士閱十年以編修考授御史時國防廢弛海軍尤不振朝廷迺移其費修頤和園兆泰上疏力爭略謂畿輔奇災嗷鴻徧野僭仆載塗此正朝廷減膳徹樂之時非土木興作之日乞罷園工以慰民望以光繼列祖列宗儉德太后怒罷其官歸里後厯主龍泉經心書院講席充學務公所議長宣統二年卒其先有何金壽者字鐵生籍江夏同治元年一甲二名進士授編修出督河南學政還充日講起居注官光緒二年晉饑上儲糧平糶策越二年畿輔旱金壽曰此樞臣可盡彈也迺援漢代天災策免三公爲言請罷樞臣回天意越日命下恭親王奕訢等五人並罷職留任

直聲震一時五年復遷陳時弊斥言中外臣工皆瞻徇侃侃不撓上以所奏爲祛積習特宣示忤當軸意出知江蘇揚州府未出都會崇厚與俄定約敕下廷臣議金壽引西國上下議例請資衆論折強敵逾歲到官錄築隄功賜三品服八年秋禱雨中暈病卒貧不能歸葬總督左宗棠等上其事於朝謂有古循吏風云

安維峻字曉峯甘肅秦安人初以拔貢朝考用七品小京官光緒六年成進士改庶吉士授編修十九年轉御史未一年先後上六十餘疏日韓釐起時上雖親政遇事必請太后意旨和戰不能獨決及戰屢敗世皆歸咎李鴻章主款于是維峻上言李鴻章平日挾外洋以自重固不欲戰有言戰者動遭呵斥淮軍將領望風希旨未見賊先退避偶見賊即驚潰我不能激勵將士決計一戰乃俯首聽命于賊然則此舉非議和也直納款耳不但誤國而且賣國中外臣民無不切齒痛恨而又謂和議出自皇太后太監李蓮英實左右之臣未敢深信何者皇太后既歸政若仍遇事牽制將何以上對祖宗下對天下臣民至李蓮

英是何人斯敢干政事乎如果屬實律以祖宗法制豈復可容唯是朝廷受李鴻章囑喝不及詳審而樞臣中或係私黨甘心左袒或恐決裂姑事調停李鴻章事事挾制朝廷抗違諭旨唯冀皇上赫然震怒明正其罪布告天下如是而將士有不奮興賊人有不破滅者即請斬臣以正妄言之罪疏入上諭軍國要事仰承懿訓遵行天下共諒乃安維峻封奏託諸傳聞竟有皇太后遇事牽制之語妄言無忌恐開離間之端命革職發軍臺維峻以言獲罪直聲震中外人多榮之訪問者萃于門餞送者塞于道或贈以言或資以贖車馬飲食衆皆爲供應抵戍所都統以下皆敬以客禮聘主講掄才書院二十五年釋還遂歸里三十四年起授內閣侍讀充京師大學總教習宣統三年復辭歸越十有五年卒維峻崇樸實尙踐履不喜爲博辨尤嚴義利之分歸後退隱柏崖杜門著書隱然以名教綱常爲己任每談及世變輒憂形於色卒抑鬱以終著有四書講義詩文集

文悌字仲恭瓜爾佳氏滿洲正黃旗人以筆帖式歷戶部郎中出爲河南知府

改御史光緒二十四年變法詔下禮部主事王照應詔上言尙書許應騷不爲代奏御史宋伯魯楊深秀聯名劾以守舊迂謬阻撓新政諫應騷明白回奏復奏稱珍惜名器物色通才並辭連工部主事康有爲請罷斥驅逐奏上以抑格言路首違詔旨禮部尙書侍郎皆革職賞照四品京堂文悌以言官爲人指使黨庇報復紊亂臺諫遂上疏言康有爲向不相識忽踵門求謁送以所著書籍閱其著作以變法爲宗而尤堪駭詫者託辭孔子改制謂孔子作春秋西狩獲麟爲受命之符以春秋變周爲孔子當一代之王者明似推崇孔子實則自申其改制之義乃知康有爲之學術正如漢書嚴助所謂以春秋爲蘇秦縱橫者耳及聆其談治術則專主西學以師法日本爲良策如近來時務知新等報所論尊俠力伸民權興黨會改制度甚則欲去拜跪之禮儀廢滿漢之文字平君臣之尊卑改男女之外內直似只須中國一變而爲外洋政教風俗即可立致富強而不知其勢小則羣起鬪爭立可召亂大則各便私利賣國何難曾以此言戒勸康有爲乃不思省改且更私聚數百人在輦轂之下立爲保國會日執途

人而號之曰中國必亡必亡以致士夫惶駭庶衆搖惑設使四民解體大盜生心藉此以集衆匪徒招誘黨羽因而犯上作亂未知康有爲又何以善其後曾令其將忠君愛國合爲一事勿徒欲保中國而置我大清於度外康有爲亦似悔之又曾手書御史名單一紙欲臣倡首鼓動衆人伏闕痛哭力請變法當告以言官結黨爲國朝大禁此事萬不可爲以康有爲一人在京城任意妄爲徧結言官把持國事已足駭人聽聞而宋伯魯楊深秀身爲臺諫公然聯名庇黨誣參朝廷大臣此風何可長也伏思國家變法原爲整頓國事非欲敗壞國事譬如屋宇年久失修自應招工依法改造若任三五喜事之徒曳之傾倒而曰非此不能從速恐梁棟毀折且將傷人豈有爲之變法何以異是此所以不敢已於言也疏上斥回原衙門行走太后復訓政賞文倬知府旋授河南知府二十六年兩宮西狩文倬迎駕擢貴西道乞病歸卒

江春霖字杏村福建莆田人光緒二十年進士選庶吉士授檢討二十九年轉御史首論都御史陸寶忠干烟禁不宜爲臺長劾親貴及樞臣疆臣章凡數十

上德宗季葉袁世凱出督畿輔入贊樞廷權勢傾一時春霖獨論列十二事謂
洪範有言臣之有作威作福其害於爾家凶於爾國左氏傳云受君之祿是以
聚黨有黨而爭命罪孰大焉今世凱所爲其心即使無他其跡要難共諒歷攷
史冊所載權臣大者貽憂君國小者禍及身家竊竊神器之徒姑置勿論即功
在社稷如霍光李德裕張居正亦以權寵太盛傾覆相尋今不獨爲國家計宜
加裁抑即欲使世凱子孫長守富貴亦不可無善處之法嗣是糾彈世凱及慶
親王奕劻父子連上八疏皆不報然朝貴頗嚴憚之宣統改元醇親王載灃既
攝政其弟載洵載瀾分長軍諮海軍頗用事春霖謂古者鄭寵共叔失教旋譏
漢驕厲王不容終病載在史冊爲萬世戒二王性成英敏休戚相關料不至蹈
覆轍而慎終於始要宜杜漸防微又謂景皇帝以神器付之皇上冲齡踐阼軍
國重事監國攝政王主之治同其樂亂同其憂國之不保家於何寄篇末又言
監國歲未及週物議沸騰至於此極臣不禁爲祖宗三百年國祚效買生痛哭
流涕長太息矣明年又勅江西巡撫馮汝驤設欺狀效宋臣包拯七上彈章末

復言是非不明請將前後章奏明詔宣示敕部平議語至懇直被訶責復劾奕劻老奸竊位多引匪人非特簡忠良不足以贊大猷挽危局詞連尙書徐世昌侍郎楊士琦沈雲沛總督陳夔龍張人駿巡撫寶桑恩壽等十數人朝旨再責之令回原衙門行走春霖遂稱疾歸越八年卒

論曰有清列帝家法最嚴迨至季世創制垂簾於是閹寺漸肆而親貴權要亦聲勢日著雖有直言敢諫之士無補危亡亦盡其心焉而已可讀尸諫幸鑒孤忠一新仁守維岐先後直言皆以語侵太后獲罪文倬言攻結黨實敗黨爭而春霖連劾權貴言尤痛切當國者終於不悟又有太監寇連才上書泣諫請太后歸政廢頤和園且言不爲祖宗天下計獨不自爲計終以違制被刑以死建言又何得以閹官少之類無可歸故附見於此

清史稿

列傳二百三十三

郭嵩燾

崇厚

曾紀澤

薛福成

黎庶昌

馬建忠

李鳳苞

洪鈞

劉瑞芬

徐蕺朋

楊儒

郭嵩燾字筠仙湖南湘陰人道光二十七年進士選庶吉士連曼歸會粵寇犯長沙甘國藩奉詔治軍嵩燾力贊之出贛事亟江忠源乞師國藩國藩遣之往從忠源守章門是時寇艘集饒瑞分泊長江因獻編練水師議忠源聽之令具疏請敕湖南北四川製戰艦百餘艘嗣以贛被圍久船非可剋期造迺先造巨筏列礮其上與陸師夾擊寇引去厥後用以塞湖口者即此筏也湘軍名大顯論功授編修還朝入直上書房咸豐九年英人犯津沽僧格林沁撤北塘備嵩燾力爭之議不合辭去同治改元起授蘇松糧儲道遷兩淮鹽運使庫儲竭諸

軍仰餉淮餉者數十萬嵩濂躬自掣驗配置各營提督李世忠擁重兵行私餒亡誰何益遣人捕治之運政迺明年署廣東巡撫寇偏陽山亟使張運蘭擊卻之韶安陷饒平大埔警與總督瑞麟遣將防邊追入韶安城殺數千人軍稍振是時金陵克罷釐捐議起嵩濂陳說利害凡千餘言事遂寢僞森王侯玉山避匿香港恃英爲護符官吏莫能捕嵩濂援公法與爭執以歸論斬而瑞麟遽張其功以率兵往捕聞嵩濂力止之不可英人大患數移牒詰責初毛鴻寶督粵事皆決於幕寮徐灝瑞麟繼至灝益橫嵩濂銜之上疏論軍情數誤劾逐灝並自請罷斥事下左宗棠宗棠言其迹近負氣被訶責左郭本姻家宗棠先厄於官文罪不測嵩濂爲求解肅順並言於同列潘祖蔭白無他始獲免至是宗棠竟不爲疏辨嵩濂念事皆絲督撫同城所誤逾歲解職遂上疏極論其弊不報光緒元年授福建按察使未上命直總署擢兵部侍郎出使英國大臣兼使法英人馬加理入滇邊遇害嵩濂疏劾岑毓英意在朝廷自能其職藉籍外人口也而一時士論大譁謂嵩濂矧外嵩濂言旣不用英使威妥瑪出都邦交幾

裂嵩燾又欲以身任之上言交涉之方不外理勢勢者人與我共可者與不可者拒理者所以自處勢足而理直固不可違勢不足而別無可恃尤恃理以折因條列四事以進而郎中劉錫鴻者方謀隨嵩燾出使慮疏上觸忌過之比嵩燾覺始補上而事已無及既莅英錫鴻爲副使益事事齟齬之嵩燾不能堪乞病歸主講城南書院未幾而俄事棘崇厚以辱國論死羣臣多主戰徵調騷然嵩燾於是條上六事曰收還伊犁歸甘督嚴議曰遣使議還伊犁當赴伊會辦曰直截議駁暫聽俄人駐師曰駐英法公使不宜遣使俄曰議定崇厚罪名當稍準萬國公法曰廷臣主戰止一隅見當斟酌情理之平上嘉其見確已而召曾紀澤使俄卒改約嵩燾雖家居然頗關心君國朝鮮亂作法越畔開皆有所論列逮馬江收恭親王奕訢等去位言路持政府益亟嵩燾獨憂之嘗言宋以來士夫好名致誤人家國事託攘外美名圖不次峻擢泊事任屬變故興遷就倉皇周章失厝生心害政莫斯爲甚是疏傳於外時議咸斥之及庚子禍作其言始大驗而嵩燾已於十七年卒矣著有禮記質疑四十九卷大學中庸質疑

三卷訂正家禮六卷周易釋例四卷毛詩約義二卷綏邊徵實二十四卷詩文集若干卷其弟崑齋字意城以舉人參張亮基戎幕與宗棠俱李開方援湖北自懷慶折而南武昌夜半得報亟調師會鵠公頸驟遇寇寇出不意大擾亂遂斬開方殲其軍報至亮基始知之崑齋恒以是自喜駱秉章撫湘崑齋從國藩東征宗棠援浙軍資並倚之由國子監助教歷加四品卿後劉峴討黔苗崑齋久引疾歸力起贊軍事苗將平又辭去光緒八年卒

崇厚字地山完顏氏內務府鑲黃旗人河督麟慶子道光二十九年舉人選知階州歷遷長蘆鹽運使咸豐十年署鹽政疏請停領餘引代銷滯引依永平低價會僧格林沁治畿輔水田又勸墾葛沽鹽水沽沃鹵地四千二百餘畝明年充三口通商大臣又明年遷大理寺卿仍留津與英法重修租界條約同治改元以兵部侍郎參直隸軍事尋署總督時葡萄牙遣使入京乞換約崇厚牒請總署標勿受法使哥士耆緩頰始莅津朝命崇厚承其事次年諭遏冀州竄匪坐失機被責已而丹使踵葡例拒如初復命爲全權大臣訂約五十五條通商

章程九款自是而荷而日而比而意而奧皆遣使求取並爲延款語具邦交志復建議設北洋機器局城南分局城堞礮臺與郡城遙相峙五年貸款墾海河北岸首邢家沽訖臥河村中洩爲渠闢稻田可五百頃手訂試墾章程於是兩岸爲沃野九年津郡民教失和被議事寄朝廷遣使修好命充出使法國大臣是爲專使一國之始然事畢即返歷署戶部吏部侍郎光緒二年署奉天將軍疏請擇地設官置寬甸懷仁通化三縣增邊關兵備道升昌圖爲府改八家鎮爲縣徙經歷駐康家屯改梨樹城爲廳徙照磨駐八面城其通判知縣並加理事同知銜兼治蒙民議行先後疏論吉林積弊請辦馬賊懲衆博清積訟覈荒地除金匪又以私墾圍場者衆爲懇寬其既往已墾者量丈升科未墾者擇地安插仍留隙地以講武稱旨四年俄界回寇擾邊與其外部格爾斯合力禁止其秋授出使俄國大臣加內大臣銜晉左都御史明年赴俄初左宗棠進兵伊犁乘俄土戰爭要俄人退去庫爾札俄人多所挾求至是崇厚抵利伐第亞謁俄皇達使命貿然與訂和約一自嘉峪關逕西安漢中建漢口俄有通商權一

自松花江至伯都訥貿易自由一自蒙古及天山南北輸入商品不課稅金一自西伯利亞至張家口歸俄敷設鐵道一自陝甘至漢口既權常稅其雜稅概免一嘉峪關科布多哈密吐魯番烏魯木齊庫車置領事官一凡俄國臣民旅華許攜銃器一伊犂城及旁近地凡俄所有土地及建築物不在還付例約成朝野譁然於是修撰王仁堪洗馬張之洞等交章論劾上大怒下崇厚獄定斬監候以徇俄人請貸死仍羈禁更遣曾紀澤往俄更約爭回伊犂南路七百餘里嘉峪關諸地緩置官十年崇厚輸銀三十萬濟軍釋歸遇太后五旬萬壽隨班祝嘏朝旨依原官降二級賞給職銜十九年卒年六十有七

曾紀澤字劼剛大學士國藩子少負雋才以蔭補戶部員外郎父憂服除襲侯爵光緒四年充出使英法大臣補太常寺少卿轉大理寺六年使俄大臣崇厚獲罪去以紀澤兼之先是俄乘我內亂據伊犂及回部平迺舉以還我議定界通商崇厚不請旨遽署押所定約多失權利因詔紀澤兼使俄議改前約俄以崇厚罹大辟怫甚紀澤慮礙交涉請貸崇厚死上許之諭監禁紀澤迺疏言伊

犂一役辦法有三曰戰守和言戰者謂左宗棠等席全勝之勢不難一戰臣竊謂伊犂地形巖險俄爲強敵非西陲比兵戎一啟後患滋長東三省與俄毘連根本重地防不勝防或欲游說歐邦使相牽制是特戰國之陳言耳各邦雖外和內忌而協以謀我則同孰肯出而相助言守者則謂伊犁邊境若多糜巨帑以獲之是爲荒遠潰腹心也不如棄而勿收不知開國以來經營西域者至矣聖祖世宗不憚勤天下力以征討之至乾隆二十二年伊犁底定腹地始得安枕今若棄之如新疆何說者謂姑紓吾力以俟後圖不知左宗棠等軍將召之使還乎則經界未明緩急何以應變抑任其道遙境上則難於轉餉銳氣坐銷是今日之事戰守皆不足恃仍不外言和亦有辦法三曰分界通商償款其小者也即通商亦較分界爲輕何以言之西國定約之例有常守不渝者亦有隨時修改者不渝者分界是也此益則彼損是以定約之時其難其慎修改者通商是也若干年修改一次條文之不善商務之受損正賴此修改之年可以換約固非彼族所得專也俄約經崇厚議定俄君署押今欲全數更換勢所不

能臣愚以爲分界旣屬常守之局必當堅持力爭若通商各條惟當去其太甚其餘從權應允俟諸異日之修改庶和局可終保全不然事機決裂必須聲罪致討此戰之說也廟堂勝算固非使臣所敢議也不然暫置伊犁勿論此守之說也是邊界不可稍讓而全境轉可盡捐臣亦未敢以爲是也再不然姑先爲駁議俟不得已時酌量允之此和之說也是迺市井售物嘗試之術非所以敦信義馭遠人也蓋準駁貴有一定之計勿致後日迫於事勢復有後允之條今臣至俄都但言兩國和好自應遣使通誠至辨論公事傳達語言係使臣職分俟接奉本國文牘再行商議如此立言庶不至見拒隣邦貽國羞辱臣竊下唯恐有懷遵聖訓不激不隨冀收得尺得寸之功稍維大局及至俄日與俄外部及駐華公使布策等反復辨論凡數十萬言十閱月而議始定崇厚原約僅得伊犁之半巖險屬俄如故紀澤爭回南境之烏宗烏山帖克斯川要隘然後伊犁拱宸諸城足以自守且得與喀什噶爾阿克蘇諸城通行無阻其他分界及通商條文亦多所釐正焉七年遷宗人府府丞左副都御史秩滿留任三載法越

構衅紀澤與法抗辯不稍屈疏陳備禦六策十年晉兵部侍郎與英人議定洋藥稅釐歲增銀六百餘萬明年還朝轉入總理各國事務衙門調戶部兼署刑部吏部各侍郎十六年卒加太子少保諡惠敏子廣鑾左副都御史廣銓兵部員外郎

薛福成字叔耘江蘇無錫人以副貢生參曾國藩戎幕積勞至直隸州知州光緒初元下詔求言福成上治平六策又密議海防十事時總稅務司赫德喜言事總署議授爲總海防司福成上書力爭迺止八年朝鮮亂張樹聲代李鴻章督畿輔聞變將牒總署奏請發兵福成慮緩則蹈琉球覆轍請速發軍艦東渡援之亂定以功遷道員十年授甯紹台道法蘭西收盟搆兵越南詔緣海戒嚴甯波故浙東要衝也方是時提督歐陽利見頓金雞山楊岐珍頓招寶山總兵錢玉興分守要隘諸將故等夷不相統攝巡撫劉秉璋檄福成綜營務調護諸將築長牆釘叢楮造電綫清間諜絕嚮導與窺伺其南洋援臺三艦爲法人追襲駛入鎮海口復令其合力守禦謀甫定而寇氛逼矣再至再卻之卒不得逞

而去十四年除湖南按察使明年改三品京堂出使英法義比四國大臣歷光祿太常大理寺卿留使如故未幾坎巨提來乞師坎故疆摩回部自英滅克什米爾遂爲所屬近且築路貫其境坎拒之戰弗勝迺求援朝旨使福成詰其故福成晤英外部沙力斯伯里訓知其防俄心切遂與訂定會立坎曾以釋嫌怨因具選立本末以上並陳英俄互爭帕米爾狀請趣俄分界冀英隱助已而被命集議演緬界綫商務先是曾紀澤使英謀將南掌揮人諸土司盡爲我屬議未決而歸至是福成繼之始變前規稍拓邊界訂定條約二十款語具邦交志福成任使事數年恆惓惓於保商疏請除舊禁廣招徠其爭設南洋各島領事官尤持正義英人終亦從之又以英法教案牽涉既廣條列治本治標機宜甚悉其將歸也復撮舉見聞上疏以陳大指謂宜厲人才整戎備濬利源重使職爲棄短集長之策二十二年歸至上海病卒優詔賜卹卒後半載而中英訂附款致將福成收回各地割棄泰牛論者惜之福成好爲古文辭演迤平易曲盡事理尤長於論事紀載著有庸菴文編筆記海外文編出使英法義比日記浙

東籌防錄

黎庶昌字莼齋貴州遵義人少嗜讀從鄭珍游講求經世學同治初元星變應詔上書論時政條舉利病甚悉上嘉之以廩貢生授知縣交會國藩差序國藩素重鄭氏接庶昌延入幕歷署吳江青浦諸邑兩筦樞關稅驟進光緒二年郭嵩澂出使英國調充參贊歷比瑞葡奧諸邦著書以撮所聞見成西洋雜誌晉道員七年命充出使日本大臣值議琉球案及華商雜居事其外部井上馨持甚堅庶昌翻復辨論卒如所議明年日本將變朝鮮庶昌電請速出援師爲先發制人計師至日艦知有備還言歸於好中國古籍經戎燼後多散佚日藩族弄藏富庶昌擇其足翼經史者刊古逸叢書二十六種中法易約條列七事進尋遭憂歸服闋仍故官十七年除川東道川俗故闇儒既莅事設學堂倡實業建病院整武恤商百廢具舉中東事起庶昌曰日本蓄謀久矣朝鮮猶其外府也戰固難勝讓亦啟侮迺倡布告列邦議以維持屬國愿東渡排難當事者弗納及戰事殷財訕庶昌首輸萬金請按職列等差亦不報二十一年詔陞見駐

渝法領事聞其將去留辦教案代者多方困之造疾遂去官未幾卒川東民建
祠瀉郡祀之馬建忠字眉叔江蘇丹徒人少好學通經史憤外患日深乃專究
西學派赴西洋各國使館學習洋務歷上書言借款造路設海軍通商開礦
興學儲材北洋大臣李鴻章頗稱賞之所議多採行累保道員光緒七年鴻章
遣建忠赴南洋與英人議鴉片專售事建忠以鴉片流毒中外騰謗當寓禁於
征不可專重稅收時英人持正議者亦以強開煙禁責其政府引以爲恥聞建
忠言雖未能遽許皆稱其公八年朝鮮始與美國議約鴻章奏派建忠往蒞盟
約成英法先後遣使至建忠介之皆如美例成約日本駐朝公使屢調結約事
建忠祕不使預聞日人滋不悅建忠歸而朝鮮亂作庶昌以聞時鴻章以憂去
張樹聲權北洋大臣令建忠偕海軍提督丁汝昌率兵艦東渡觀變建忠抵仁
川日本海軍已先至建忠設辭緩之而亟請速濟師代定亂朝命提督吳長慶
率三千人東援建忠先定誘執首亂之策偕長慶汝昌往候大院君李是應減
騶從示坦率及是應來報謁建忠遂執之強納諸與交長慶夜達兵輪而汝昌

護送至天津復擒亂黨援朝鮮國王復其位日使雖有言而亂已定亦無如何
皆建忠謀也於是長慶統軍留駐其隨員袁世凱始來佐營務及建忠歸而維
新黨之亂又作日軍先入交涉屢失機其後卒致全敗建忠憤後繼失人初謀
盡毀譟東行錄以記其事建忠博學善古文辭尤精歐文自英法現行文字以
至希臘拉丁古文無不兼通以泰西各國皆有學文程式之書中文經籍雖皆
有規矩隱寓其中特無有爲之比擬而揭示之遂使學者論文困於句解知其
然而不能知其所以然乃發憤剏爲文通一書因西文已有之規矩於經籍中
求其所同所不同者曲證繁引以確知中文義例之所在務令學者明所區別
而後施之於文各得其當不唯執筆學爲古文詞有左宜右有之妙即學泰西
古今一切文學亦不難精求而會通焉書山學者皆稱其精推爲古今特剏之
作又著有適可齋記言記行等書

李鳳苞字丹厓少聰慧究心歷算之學精測繪丁日昌撫吳知其才資以貲爲
道員歷辦江南製造局吳淞炮臺工程局繪地球全圖並譯西洋諸書日昌爲

船政大臣調充總考工朝議遣生徒出洋加三品卿派爲監督光緒三年率赴英法兩國分置肄業明年賜二品頂戴充出使德國大臣旋兼使奧義荷三國往來數千里周旋各國間聯絡邦交時建議興海軍並命督造戰艦十年法越構毀暫署法使法事決裂遂奉命回國歸過澳門澳門自明中葉久爲葡萄牙人稅居及是葡人私議欲攘爲己有風苞寓書部臣乞請旨與葡人定約免後患部臣懼生事寢其議後一年葡人遂據其地論者惜之既覆命有旨發往直隸交李鴻章差遣令總辦營務處兼管水師學堂未幾以在德造艦報銷不實被議革職十三年卒著有四裔編年表西國政聞彙編文藻齋詩文集等其他音韻地理數學皆有論著未成

洪鈞字文卿江蘇吳縣人同治七年一甲一名進士授修撰出督湖北學政歷典陝西山東鄉試遷侍讀視學江西光緒七年歷遷內閣學士母老乞終養嗣丁憂服闋起故官出使俄德奧比四國大臣管兵部左侍郎初喀什噶爾續勘西邊界約中國圖學未精乏善本鈞莅俄以俄人所訂中俄界圖紅綫均與界

約符私慮英先發迺譯成漢字備不虞十六年使成備之歸命直總理各國事務衙門值帕米爾爭界事起大理寺少卿延茂謂鈞所譯地圖畫蘇滿諸卡置界外致邊事日棘迺痛劾其貽誤狀事下總督察覆總署同列諸臣以鈞所譯圖本以備考覈非以爲左證且非專爲中俄交涉而設安得歸咎於此圖事白而言者猶未息右庶子準良建議帕地圖說紛紜宜求精確於是鈞等具疏論列謂內府輿圖一統志圖紀載漏略總署歷辦此案證以李鴻章譯寄英國與許景澄集成英俄德法全圖無大紕繆而覈諸準良所奏則歧異甚多欽定西域圖志叙霍爾干諸地則總結之曰屬喀什噶爾叙喇楚勒葉什勒庫勒諸地則總結之曰屬喀什噶爾西境外文義明顯原奏迺謂其曰境外者大小和卓本舊境外也曰屬者屬今喀什噶爾爲國家自闢之壤地也語近穿鑿喀地正北東北毘俄七河正西倚俄費爾干其西南錯居者帕也後藏極西曰阿里西北循雪山逕挪格爾坎巨提訖印度克什米爾無待北涉帕地設俄欲躡喀英欲徧阿里不患無路原奏迺謂二國侵奪拔達克山安集延而終莫得通斯於

邊情不亦闡乎中俄分界起科布多塔爾巴哈臺伊犁訖喀西南烏仔別里山口止並自東北以達西南原奏迺謂當日勘界自俄屬薩馬干而東實以烏仔別里西口爲界今斷以東口大乖情勢案各城約無薩馬干地名惟浩罕安集延極西有薩馬爾干明史作撒馬兒罕久隸俄與我國無涉當日勘界並非自西而東亦無東西二口之說不知原奏何以傳說若此謹繪許景澄所寄地圖以進並陳扼守葱嶺及爭蘇滿有礙約章狀先是坎巨提之役彼此爭甚其間我是以有退兵徹卡之舉英乘隙而使阿富汗據蘇滿至是俄西隊出與阿戰東隊且駁駁偏邊境總署復具籌辦西南邊外本末以上鈞附言自譯中俄界圖知烏仔別里以南東西橫亘皆是帕地喀約所謂中國界綫應介乎其間今日俄人爭帕早種因喀城定約之年劉錦棠添設蘇卡意在拓邊無如喀約具在成事難說唯依界圖南北經度斜綫自烏仔別里徑南尙可得帕地少半尋按故址已稍廓張俄阿交關揣阿必潰俟俄退兵可與議界當更與疆臣合力經營爭得一分即獲一分之益上皆嘉納十九年卒予優卹鈞嗜學通經史嘗

譚元史釋文證補取材域外時論稱之

劉瑞芬字芝田安徽貴池人以諸生從李鴻章軍援上海檄主水陸軍械轉運時初用西式槍礮皆購自外洋瑞芬考驗精審應時解濟淮軍遂以善川西洋利器名累保道員督辦松滬釐捐光緒二年權兩淮鹽運使淮北荐饑流民就食揚州瑞芬築圩城外構棚分宿計口授食所全活六萬餘人旋授蘇松太道租界以黃浦南北分華洋船埠洋人時侵南岸瑞芬丈量南北中分爲界設水利局委員董其事洋人亦就範焉擢江西按察使遷布政使十一年改三品京堂命充出使英俄等國大臣授太常寺卿遷大理仍留使改駐英法義比初俄人覬覦漠河金礦瑞芬亟達總理衙門預議先自開辦英既占緬甸罷其朝貢瑞芬執故事與爭乃如舊英復侵西藏瑞芬力爭於其外部追還印度入藏之師乃別議藏印條約事具邦交志瑞芬久事外交有遠見朝鮮亂初起即上書言朝鮮毗連東三省關係甚重中國能收其全土改行省上策也次則當約英美諸國共議保護庶免強鄰獨占存藩屬以固邊陲總署寢其議不行其後果

如所言十五年召授廣東巡撫十八年卒卹如制子三世珩字聚卿光緒二十年舉人累至道員歷辦江南商務官報學務工程湖北造幣等事旋擢度支部參議加三品卿條議幣制中外稱其精確未及行而辛亥變起遂歸寓上海丙寅年卒嗜古富藏書校刊古籍尤精有衆學軒叢書貴池先哲遺書玉海堂宋元槧本叢書及曲譜曲品等

徐壽朋字進齋直隸清苑人本籍浙江紹興以廩貢生納貲爲主事諳習外情佐津海關辦交涉光緒二年以道員充美日使館二等參贊時華人傭於洛士丙冷者多被虐殺壽朋佐使臣鄭藻如索償詞鋒義屈未竟會開秘魯使館移充駐秘參贊攝行公使事秘故虐遇華工益苛其例壽朋與秘廷辨論多所補救駐外久辦理交涉常服遠人晉二品秩還國適李鴻章督畿輔辟居幕府疏薦其練吏治熟邦交召見奏對稱旨二十四年授安徽徽甯池太廣道遷按察使未半載徵還命以三品京堂充韓國全權議約大臣既至與其外部朴齊純議定商約十三條語具邦交志初韓本爲我屬國貢獻不絕自馬關定新約認

爲獨立自主遂以壽朋膺使命是爲中韓立約之始其秋除太僕寺卿約成改充出使韓國大臣奏設漢城總領事惠保僑民始復自治權二十六年聯軍入京鴻章被命議和奏調壽朋佐議壽朋習西國語言文字徐起應付卒能不失鴻章本意逾歲議定和約十二款復力請回鑾遷外務部左侍郎尋病卒予優卹

楊儒字子通漢軍正紅旗人以監生納貲爲員外郎銓兵部舉同治六年鄉試久之出爲常領道母憂服闋除溫處道調徽甯池太道光緒十八年改四品卿出使美日秘三國大臣補太常寺少卿與英外部葛禮山續定華工條約歷通政使副使左副都御史留使如故二十二年調使俄奧和三國越二年督工部侍郎仍駐俄二十六年拳亂作聯軍入津沽電命儒遞國書乞俄調解京師陷車駕幸西安俄佯議撤兵而潛使人詣關東掠吉林黑龍江地達營口北儒至黑海行宮與婉商俄允還地而不允撤保路兵將軍增祺遽與訂密約九款多失權利上責其謬妄下嚴旨仍令儒與俄議儒與商更約俄堅拒儒正色曰既

言保我自主何兵權利權命官權而不予畀既稱不利土地何以東三省不爲中國版圖俄窮於應始允別立正約上聞而嘉之授爲全權大臣逾歲俄交草約十二款趣畫押東南士民甚激昂各國亦騰口舌朝旨命再商改儒責其外部食言語激切俄人勉爲改數事而仍未平準儒數往謁拒不見見則第趣畫諾語竟即起不容儒致一詞儒憤出及階路傷右足乞假赴德奧療治俄留之且因其病篤命駐華公使戢耳詩與李鴻章在京協定儒復請代不許調戶部明年正月卒予優卹

論曰中國遣使始於光緒初嵩齋首膺其選論交涉獨具遠識崇厚擅定俄約誤國甚矣紀澤繼之抗議改正其時國勢猶足自申焉至儒爭密約竟以憤死終不能挽救公理尙可恃乎福成庶昌諸人並嫻文學各有著述討論修飾皆美使才也馬建忠定亂濟變策奇制勝亦有足多故並附於篇

清史稿

列傳二百三十四

丁寶楨

李瀚章

楊昌濬

張樹聲

衛榮光

劉秉璋

陳士杰

陶模

李興銳

史念祖

丁寶楨字稚璜貴州平遠人咸豐三年進士選庶吉士母喪里居遵義楊隆喜反斥家財募壯士八百捍鄉里戰始不利繼獲大勝服闋會苗教熾起巡撫蔣蔚遠奏留軍特旨授編修增募至四千人復平越獨山諸城十年除知岳州府始罷遣所募兵虧餼巨萬迺陳五百金案上語衆曰與諸君共事久今庫饋訕徒手歸奈何衆泣曰公毀家紓難我等敢他求乎遂去越歲調長沙有客軍數千以無主將譁變立請大府貸發三萬斬五人事遂定同治二年擢山東按察使會僧格林沁治兵魯豫間令擊河北宋景詩旋効其擅議招撫部議降二級

又明年遷布政使僧格林沁戰歿曹州坐法再干議皆得恩旨留任於是言者復抵他款彈之事下曾國藩國藩白其無罪巡撫閻敬銘夙高其能至是乞休舉以自代遂拜巡撫之命時捻趨海滋李鴻章建議築牆膠萊河寶楨會軍燧之六年東捻走濰河東軍王心安築壘方成而隄牆未竣捻長驅渡河寶楨以聞上怒鴻章交部議寶楨亦褫職留任先是東軍守濰河本皖將潘鼎新汛地皖軍甫南移而北路遽失詔斬心安寶楨抗辯迺宥心安而責鴻章寶楨復屢疏相詆於是上益責鴻章忌刻縱寇矣明年西捻趨定州近畿震動寶楨聞警即馳至東昌率騎旅千精卒三千齎五日糧倍道北援捻遂南潰是役也朝廷遣宿衛之旅出國門備寇統兵諸將帥皆獲譴讓而上獨以寶楨一軍猝出寇前轉戰雄任深祁高肅間復饒陽功最盛數降敕褒嘉加太子少保寶楨治軍善乘勢不主畫疆自守以故諸軍會集東西二渠率皆就殲山東而其誅安得海事尤著人口安得海者以奄人侍慈禧太后頗用事八年秋乘樓船緣連河南下旗幟殊異稱有密遣所過招納權賄無敢發者至泰安寶楨先已入告使

騎捕而守之安得海猶大言謂汝輩自速辜耳傳送濟南寶楨曰官豎私出非制且大臣未聞有命必詐無疑奏上遂正法河決鄆城侯家林運道梗河臣議次年興工寶楨謂宜及水涸時力疾請自任水醫隄植立不退費半功倍又塞銅瓦廂決口駐買莊聞日本構衅遂密陳海防計請築山東烟臺威海登州礮臺設深口製造機器局從之光緒二年代吳棠署四川總督至即嚴劾貪墨吏澄肅官方建機器局修都江隄裁夫馬以恤民革陋規以恤吏又改鹽法官運商銷置總局瀘州其井竈分置廠局鹽岸分置岸局歲增帑金百餘萬而猾商奸吏不便所爲爭中以蜚語於是臺諫交章糾奏寶楨已坐隄毀鑄秩矣而言者復劾停機器局視監工成絲龍茂道丁士彬灌縣令陸葆德職而尤斷斷爭鹽務上以川鹽有成效勿爲動已而成都將軍恆訓覈覆隄工亦摭及鹽運病商民流弊大寶楨抗辯上慮寶楨惑浮言敕勿易初念尋予實授寶楨彌自警勵益興積穀嚴督捕治蜀凡十年初莅事時郭內月有盜劫至是誅匪幾盡聲爲道不拾遺十一年卒官贈太子太保諡文誠予山東四川貴州建祠寶楨嚴

剛有成其初至山東也價格林沁方蹙捻淄川頗貴倨見司道官不設坐寶楨投謁告材官啓王坐則見否則罷左右皆大驚王服其強爲改容加禮敬銘聞之大稱異至之日親迓於郊自是事無大小皆咨寶楨而後行至今言吏治者常與沈葆楨並稱尤勵清操喪歸僚屬集賻始克成行云子五人體常尤著名官廣東布政使

李瀚章字筱泉安徽合肥人大學士鴻章兄也瀚章以拔貢生爲知縣餘湖南署永定調益陽改善化曾國藩出治軍檄主饌餽累至江西吉南贛甯道調廣東督糧道就遷按察使布政使同治四年擢湖南巡撫時粵逆李世賢等聚福建分犯贛南窺兩楚貴州苗匪教匪又闖入楚界而霆軍潰卒復竄湖湘三路告警瀚章至則遣前江蘇按察使陳士杰壁郴州防閩賊前雲南按察使趙煥聯壁岳州防叛卒閩賊旋引去叛卒犯江西不得逞則折入湘犯攸縣陷安仁興甯副將張義貴擊走之士杰率軍會剿遁入粵卒就殲焉先是瀚章遣總兵周洪印敗黔匪於邊界又越境解銅仁圍因奏言懸軍深入兵家所忌請敕新

任貴州布政使兆琛綬赴任專治軍事與楚軍合從之遂遣已革知府李元度進剿思南石阡教匪兆琛洪印進剿清江台拱苗匪所向克捷苗教復蟻結連竄晃州鳳凰廳各軍殲擊皆大破之黔匪遂不敢窺楚境自盜起國藩及胡林翼治師不主畫疆自守瀚章久習楚軍既受任即出境討賊亦其風類也六年調撫江蘇未至署湖廣總督七年調浙江再署湖廣總督旋實授光緒元年調四川明年還督湖廣瀚章性簡靜吏事久習知民情僞務與休息其督湖廣最久前後四至皆與弟鴻章更迭受代其母累年不移武昌官所人以為榮尋遭憂去官家居六年再起授漕運總督未幾移督兩廣粵俗舊有閩姓捐四成助餉巡撫馬丕瑤議革之會日本構衅瀚章請循舊收繳備海防時論大譁遂以疾歸又數年卒諡勤恪子十人經畬翰林院侍講

楊昌溶字石泉湖南湘鄉人粵寇亂以諸生從羅澤南治團練出援湖北連復廣濟黃梅叙訓導從征贛皖戰楓樹嶺下德興戰高沙下婺源瀕有功遷知縣同治元年從左宗棠入浙規江山與劉典劉璈分三路攻石門破寇卡數重進

取花園港縱火燔其棚會天雨止其秋規龍游昌濬禦寇蓮塘破之又敗之孟塘寇逸李世賢聞警遣悍黨赴救中路寇方攻劉培元營昌濬自山下擊寇大潰遂知衢州府明年師偪龍游城南築三壘寇夜奔昌濬踞之湯溪城拔授糧儲道與蔣益澧合兵萬三千戰餘杭城西北寇益浚濠樹壘拒師昌濬攻北門寇出戰會諸軍擊之寇卻昌濬連夷五卡次日攻林清塘去城北十里汪海洋老巢也昌濬規寇壘阻水慮日暮爲寇乘迺退師又明年規武康復其城進略湖州寇竄泗安梅溪昌濬自簪頭進桐嶺扼之北攻安吉追寇至孝豐遇湖州敗寇復與徽合攻之降者七千餘人輒解散浙西平遷監運使累擢布政使九年除巡撫巡視鎮海海口條具見聞陳大指謂宜師敵伎鍊勁旅修築礮臺上嘉納之是時朝廷方銳意求治詔舉賢才昌濬以糧道如山四人應力薦甘肅知縣陶模才器遠大卒如所言坐餘杭葛畢氏案褫職光緒四年起佐新疆軍事數遷至漕運總督十年法人擾海疆朝旨以閩事亟命宗棠爲欽差大臣主軍務昌濬與穆圖善佐之張佩綸則會辦也閩浙總督何璟自以不諳兵事請

解職遂命昌濬代之昌濬未至軍而佩綸已通事下宗棠昌濬覆奏入上責其袒護移督陝甘加太子太保昌濬性和巽而務爲姑息督甘日左右通回匪莫能制槍械反資寇遂釀成湟中河狄亂昌濬檄各路募土勇助戰守電令提督雷正綰往河州鎮懾張永清往西甯策應蘇員嶠往巴燕戎甘都堂駐防並具起事巔末以上事聞嚴旨責其庸賸迺罷官二十三年卒釋處分嗣以魏光燾請予甘肅建祠

張樹聲字振軒安徽合肥人粵寇擾皖北以廩生與其弟樹珊樹屏治團殺賊復越境出擊連下含山六安英山霍山潛山無爲而太湖一役以五百人陷陣擊退陳玉成衆數萬功尤盛復力行堅壘清野法其時劉銘傳周盛波潘鼎新輩皆相繼築堡聯爲一氣皖北破碎獨合肥西鄉差全曾國藩檄守蕪湖調無爲遷知府同治元年從李鴻章援上海鴻章立淮軍與銘傳等分領其衆從克江陰晉道員鴻章親視婁門程學啟軍遣樹聲援蕩口破謝家橋逐北至齊門又敗之黃埭學啟遂偏城而軍於是婁門寇道始絕二年攻無錫金匱擊寇芙

蓉山大破之奪獲戰艦器械不可稱計賜號卓勇巴圖魯予三品服樹聲乘勝趨常州逾歲攻河干二十餘營盡破之城拔進復浙江湖州詔以按察使記名四年署江蘇徐海道尋授直隸按察使赴大名督防務九年調補山西越二年擢漕運總督署江蘇巡撫十三年實授遭繼母憂歸光緒三年起授貴州巡撫適廣東總兵李揚才據靈山構匪擾越南朝旨調樹聲撫廣西治之事甯擢總督先後剿平西林苗匪武宣積匪八年鴻章喪母歸葬樹聲攝直督任值朝鮮亂作日使花房義質將兵五百入王京迫朝議約樹聲飛檄吳長慶等赴之遂成約尋盟而還於是長慶等宵攻亂黨悉殲其渠亂迺定樹聲奏令長慶暫戍朝上嘉其能加太子少保明年還督兩廣會法越構兵即以法人侵逼狀上聞逮北甯陷自請解總督職專治軍報可復坐按事不實革職留任未幾病卒諡靖達子直隸江蘇及本籍建祠樹冊自有傳樹屏以收復江蘇各州縣積助至副將從征捻駐周家口戰數捷捻平擢提督賜號額騰額巴圖魯赴晉防河光緒二年徙守河曲保德會皖軍赴援烏魯木齊甘肅流賊曹洪照竄後山樹屏

適奉檄詣省聞警乘大雪追擊之事定賜頭品服授太原鎮總兵移防包頭調大同十三年乞休既歿鴻章狀其績以上子優卹太原建祠

衛榮光字靜瀾河南新鄉人咸豐二年進士選庶吉士授編修九年湖北巡撫胡林翼奏調赴軍隨荊州將軍多隆阿攻剿黃州各郡轉戰入安徽平賊壘百餘克太湖潛山捷入以侍講待簡林翼督師勦賊榮光從常以少擊衆林翼卒乃還京供職道經新鄉適山東竄匪入境遂與知縣丁士選集團捍衛同治元年入都補翰林院侍講明年擢侍講學士疏陳剿匪防河事宜是年授濟東泰武臨道署山東鹽運使按察使四年擒首賴文光張總愚竄山東巡撫閻敬銘奏委榮光督辦河防榮光以賊無見糧利速戰堅諭各軍嚴守因賊賊乘夜偷渡榮光然礮擊之諸軍繼進賊大敗六年卸運使任仍兼署按察時賊勢復振巡撫丁寶楨督師出境省城兵單餽竭榮光募民團助守賊屢逼城下卒不能犯旋以父憂歸十二年起江安糧道署按察使光緒元年授安徽按察使遷浙江布政使護理巡撫母憂歸服闋授山西巡撫八年調江蘇臺灣道劉璈被重

勅詔刑部尙書錫珍往按復命榮光赴臺會鞠榮光言敬總營務開支浮冒罪當死然其治事疏節閤曰政頗便民故臺地番民至今有尸祝者請從寬典其持法嚴而能恕皆此類十二年調浙江巡撫再調山西以疾乞休十六年卒於家

劉秉璋字仲良安徽廬江人參欽差張芾軍敘知縣咸豐十年成進士選庶吉士授編修同治元年李鴻章治兵上海調赴營洋將戈登所練常勝軍故駐滬滋驕淮軍初至服陋械絀西弁或侮笑之秉璋語衆曰此不足病也願吾暫能戰否耳明年從克常熟太倉鴻章使別募一軍圖嘉善分寇勢遂提兵五千赴難克楓涇西塘遷侍講進攻張涇匯約水師夾擊彈丸貫膺下不少卻卒克之規平湖其酋陳殿選降於是乍浦海鹽澈浦皆反正又明年與程學啟攻嘉興秉璋入東門燔藥庫寇賊亂衆軍乘之城拔進取湖州攻吳淞南潯所向摧靡浙西平賜號振勇巴圖魯歷遷侍講學士四年授江蘇按察使從曾國藩討捻時捻騎颯疾國藩與鴻章皆主圍制策秉璋力贊之破捻豐沛宿遷南追至倉

家集擒大潰又敗之淮南長驅蒙城擒西走自此擒分東西國藩令秉璋軍豫西專剿東擒與提督劉鼎勳俱其冬追入鄂六年除山西布政使未上擒自孝威小河溪竄河口鎮與鼎勳軍追之勳軍前鋒遇伏總兵張遵道戰死勢益熾秉璋橫截之始奔豫七年鴻章代國藩督師議扼運甕擒海隅秉璋駐運西擒撲濰河將自沂莒窺江淮秉璋亟渡河詣桃源會浙軍扼清江亡何賴曾率殘騎數千至追破之淮城事甯被賞賚父憂歸服闋起江西布政使光緒元年擢巡撫以母老再乞終養六年遭喪至九年再起撫浙會法越構衅緣海戒嚴秉璋躬履鎮海令緣岸築長牆置地雷悉所有兵輪五梭輔以紅單師船據險設防十一年法艦入蛟門令守備吳杰轟拒之傷其三梭越數日復入虎蹲山北再敗之法將迷祿中礮死然猶浮小舟潛窺南岸復令總兵錢玉興隱卒清泉嶺下突擊之敵兵多赴水死逾歲擢四川總督川境竄遠外接番夷內叢奸宄秉璋曰盜賊蠻夷何代蔑有以重兵臨之幸而勝不爲武不幸而不勝餽械轉資寇是真不可爲矣故督蜀八年歷平萬縣茂州川北秀山土寇其大小涼山

拉布浪瞻對各夷畔服靡恆則用趙營平屯田法數月間皆懾伏加太子少保御史鍾德祥劾提督錢玉興及道員葉毓榮不職狀事下湖北巡撫譚繼洵廉得實秉璋坐濫舉罪罷初丁寶楨督蜀稱弊絕風清秉璋承其後難爲繼故世多病之未受代而民教相鬩重慶先有教案秉璋初至捕教民羅元義亂民石匯等寅之法至是各屬繼起教堂被燬者數十教士忿牒總署指名奪秉璋職朝廷不獲已許之秉璋遂歸三十一年卒總督周馥及蘇紳卬彥彬等先後上其功復官予優卹建祠

陳士杰字雋丞湖南桂陽州人以拔貢考取小京官銓戶部與閻敬銘同曹司並以曠樸稱遭父憂歸值粵寇亂土匪竊發集團勇得百餘人平之俄白水奸民陷永桂新田告急衆議拒之士杰曰援新田迺所以自保也越境擊卻之曾國藩治軍衡州辟參戎幕鮑超時爲小校坐法當斬力請釋之從援湖北壁岳州城外王鑫軍次蒲圻違國藩誠敗退入空城死守國藩憤甚將士莫敢爲言士杰獨請赴救弗應固請之曰救之如何曰寇無戰船宜遣水師傍岸舉礮爲

聲援鑫因獲免於難厥後鮑王並爲名將岳州既敗寇遂略湘陰陸走寧鄉水斷靖港進陷湘潭據之國藩水師賴湘川去寧鄉靖港皆數十里或請守省城或請絕津巡奪寇艱議未決士杰謂宜援湘潭即不利猶得保衡永圖再舉國藩如其言果大捷論功遷主事尋歸省復出佐糧餉咸豐五年永桂土匪起聞亂單舸泝江歸專治團練亡何連州匪構嶺南北奸民衆十萬陷郴州與鑫會師擊之復其城遂以南防屬之留州賦充饒改團爲營號廣武軍永郴桂陽邊地千里廣武當其衝數挫寇鋒而以捍石達開功爲盛達開故黠猾麾下號百萬分七部能檢勒之使毋擾九年春自贛而西至桂陽穿城北走時廣武軍軍花園若有橋跨鍾水曰斗下渡其南兩山相銜一逕中達東西北皆環水土杰遣一裨將領百人扼橋寇夜至大驚不敢前後來者欲退則隘塞欲旁出則無路平明士杰率師轟擊之自相蹈藉墜死無算是役也士杰以數百人敗寇數十萬衆達開製省之計卒無所施上嘉之擢知府嗣錄援藍山嘉禾寧遠功晉道員同治元年三吳軍事棘以國藩薦超授江蘇按察使士杰慮石黨往來郴

永貽母憂乞終養以防遏上游爲己任數卻寇四年論功加布政使銜時江南既定而寇軍所降寇復叛自湖北金田入郴數千里無與逆戰者士杰要擊之寇大潰賜號剛勇巴圖魯十年母喪服闋除山東按察使光緒元年到官多所平反晉福建布政使未上會巡撫文格被劾詞連士杰能免尋以臺灣軍務命署福建按察使六年遷布政使明年擢撫浙江巡海口增築鎮海甞山港及定海乍浦礮臺八年移山東緣海設防吳大澂會辦北洋防務至登州烟臺見廣武軍壁壘頗采其法而增損之奏請頒行各海口而忌者中以蜚語至劾其海防草率事下尙書延煦左都御史祁世長得白海防軍罷而士杰亦病矣數請乞休始允十八年卒於家子省城及本籍建祠

陶模字方之浙江秀水人同治七年進士改庶吉士散館授甘肅文縣知縣調皋蘭左宗棠爲總督方征回又創建貢院兵工諸役並作模躬自料量民不知擾遷秦州直隸州歲旱流徙饑民數十萬屬集出積俸並割公使銀四萬餘金設粥廠不足貸金益之修養濟院增義田恤族婦州南籍水畱城堽模爲築隄

沼三百五十丈植芙蕖楊柳蓄鱗介取其利以時繕完署甘州府知府能屬縣
供億宗棠奏模治行第一調補迪化州編修廖壽豐薦模器識宏遠堪備閫寄
時回久亂民戶寥落模和輯漢回耕者復衆時議定賦則模謂經畫窮塞當通
周官一易再易之義令民以二畝當一畝徵其六緩其四宗棠采其議邊民始
有久居志厯署蘭州府蘭州道按察使調直隸按察使陝西布政使護巡撫光
緒十七年授甘肅新疆巡撫當葱嶺西有地曰帕米爾乾隆間爲我軍鋒所及
高宗嘗勒銘焉葱嶺東南有小部落曰坎巨提歲納貢於我模未至新疆俄侵
帕米爾謀通印度英攻破坎巨提中外方議戰模謂將士能戡土匪未能禦強
敵軍資百物運自內地數月乃達俄英鐵軌瞬息可至新疆與俄相接幾五千
里增兵十倍未足固當民窮財匱之時不可輕言戰惟當購機礮擴電綫飭邊
將嚴爲備羈坎巨提故曾無令北走而撫其流民與駐俄英使臣合爭議未定
俄曰防英英曰防俄莫可究詰明年二國兵益進將吏咸憤激請戰終不許於
是奏請廢黜坎巨提故曾會英人亦立其弟買賣提艾孜木令鎮撫部民歲納

貢如故事坎巨提事乃定而俄兵在帕米爾意叵測模以邊防無效自請罷斥不允廷議將以帕米爾爲三國甌脫英垂諸俄猶不可陳兵相持模取德意志兵法練邊軍選幼童百餘課以測算諸法將徐推之各軍見將佐必以惜勞苦寶槍彈爲戒初俄人借巴爾魯克山以處所屬哈薩克期十年山饒水泉林木當塔城西北廣袤數百里至是期滿無還意模爭之逾年乃如約俄商及附英諸部至新疆皆不稅模曰是獨苦吾民爲奏請普免焉繼回文字語言不相通漢民愚之貸金輒取重息至賣鬻妻子以償模爲之規定章條令讀書習漢語於是回族欣欣向化矣羅布卓爾古菖蒲海也荒沙無垠亘新疆中部模議開徑路自新疆之南青海西藏之北噶斯烏蘭達布遜阿樹達托古茲尼蟒依訥大雪山之陰迂回出入分道測繪得金鐵煤諸礦數十百計欲開採利民以紓於貲工不克舉乃於羅布淖爾北四百餘里築蒲昌城南百四十里設屯防局回民徙居成村落其後設置營縣實自模開之二十年日本略朝鮮朝議決戰師屢敗甘肅提督董福祥先以祝嘏在京募兵備戰河湟回族聞亂思蠢動二

十一年春撤拉河州西寧大通諸回先後反西寧回曾劉四伏尤悍模遣將援巴燕戎格與總督楊昌濬合疏請命福祥帥師西援夏平番回亦變河西諸府東不能通省會則西乞援新疆模奏陳回亂日亟部遣諸將羅平安成哈密牛允誠守安西玉門趙有正屯肅州而於哈密置東防營務處以道員潘效蘇護諸將諸亂回遣其徒出關煽新疆回部九月綏來回發難以有備旋定迪化回應之模調知茆民與牙役密相結捕斬六人而亂弭十月回逼甘州上罷昌濬以模署陝甘總督命入關剿撫時福祥將甘軍渡洮魏光燾將湘軍臨洮水模策東路兵大集回且西竄乃遣兵分駐天山北迪化鎮西爲中權而繕完防禦天山以南諸要隘後路既設備乃將馬步八營馳入關道經沙漠至吐魯番城回王瑪木特來會勗以大義至哈密校閱各軍令繼回與焉模以有正兵寡戒毋輕出有正喜功出攻察漢俄博永安二城皆下二十二年元夕薄北大通營敗歸模遣涼州戍軍赴援二月入關羣回斂衆山南模至蘭州視事令效蘇督諸將略北大通營破所領十大莊堡戮其酋殲數千人諸回氣奪會光燾亦定

西甯諸回自水口峽西竄青海模令效蘇等出塞陳兵玉門諸山徑毋縱賊出平地青海蒙古積弱久怵回悍告急朝議令光燾福祥二軍追逐模以師行絕域糧芻車駄重爲民累內地空虛爲禍滋大奏寢其議新疆將吏慮回更西竄亦告急朝議令提督鄧增出青海張俊防北路模策賊非至玉門敦煌掠食不能遽犯新疆復請能移軍議而令增屯肅州爲聲援光燾將湘軍還陝西以與福祥不相能也賊自青海犯玉門尤誠等擊卻之模令玉門軍赴西安五月賊大至劉四伏奪路求食諸將力戰金蘭益匹馬陷陳大敗賊於牛橋降斬各數千人飢凍死磧中者過半四伏以千數騎遁中道伏發就禽於是徙降回塔里木河濱計口授田關內外悉平論功實授總督方日事之初起也和戰議不決模言國強弱視人才人才不足和戰皆不足恃即戰勝亦無益因言天下事當變通者非一如減中額停捐例汰冗員令京官升遷不出本部司員分類治事刪棄舊案破除旗兵積習禁士大夫食鴉片分設算學藝學科目廢武科變操法擇勲舊子弟游學各國培植工藝尤願皇上鑒天災之屢警念民困之莫蘇

懷內政之宜修知外患之難弭毋始勤終怠毋狃目前而忘遠慮時中外諸臣條奏多言變法祛積習模言推行宜漸根本宜急衆聞其嗜利之輩以期富強止於舊法外增一法不得謂之變法於積習外增一習不得謂之祛積習欲求富強當先崇節儉廣教化恤農商其指意大率類此模督陝甘數年銳欲開礦製械興學廣教皆以用不足不能盡舉累疏乞罷二十六年述職入覲道疾留陝西俄調補兩廣總督兩宮西幸迎謁蒲州再乞休不允乃力疾上官二十七年疏請裁減宦官略言宦官干政史不絕書我朝家法嚴明從未有內監預聞政事然除弊如除莠留其芽孽終恐發生宜大加裁汰內廷差使悉可改用士人定宮府一體之制永不再選內監非唯一時盛事實亦千古美談別疏言變通政治宜務本原本原在朝廷必朝廷實能愛國愛民乃能以愛國愛民責百官必朝廷先無自私自利乃能以不自私不自利望天下轉移之道一曰除壅蔽一曰去畛域一曰務遠大朝廷當以身作則克己勝私否則雖日言變通無由獲變通之效粵故多盜模定清鄉章程信賞必罰凡練軍分屯許所在州縣

節制一歲中捕斬名盜千餘人欽廉肇羅諸屬盜藪皆次第削平模謂民貧思亂非殺可止令府縣設勸工廠囚不至死者令入廠教養廣東名饒富然取諸民者已重於他行省歲不足五百餘萬則取之賭規仍不足則貸之外人模賭民力已屈追呼不得寬欲有所興革皆坐中沮迭疏請疾甫受代九月卒於廣州贈太子少保諡勤肅模自爲諸生食貧力學與平湖優貢生顧廣譽震澤諸生陳壽熊吳江舉人沈曰富以道義相勵既通籍大學士閻敬銘總督楊昌濬皆嘗論薦不以告模模亦不謝也儉約自將不立崖岸恂恂卑下將吏爭爲川而無敢以私干者卒後蘭州迪化皆允建專祠

李興銳字勉林湖南瀏陽人粵寇亂以諸生治鄉團曾國藩治軍東下檄主軍精駐祁門江南飢民就食者萬計興銳慮爲寇乘先期結筏以濟獲安全叙知縣數薦知府同治四年唐義訓金國琛兩軍頓徽州索餽譁變興銳聞之單騎叩其壁諭之曰若輩不遠千里從軍討賊爲富貴計耳奈何自戕爲使寇知之而逼吾後吾無噍類矣饒不給咎在臺期以三日逾期請殺我衆曰唯命迺泚

訪主謀者三人白國藩慘之事定金陵既克儲平餘銀四十餘萬目擊戎燼後
僵屍蔽野因出所餘購義冢一區聚暴骨瘞之八年調直隸補大名府游陞道
員乞終養國藩再督兩江檄綜營務與彭玉璽規訂水師營制國藩卒李宗義
代督亦頗信仗之時日本窺臺灣江海戒嚴興銳言於宗義躬履江陰狼山吳
淞崇明擇險設守始倡緣海築礮臺議光緒改元綜辦上海機器製造局博采
西國新器增建鐵船礮廠鳩工庀材閱十稔規模略備遭母喪去官服竟命偕
鴻臚寺卿鄧承修往勘中越邊界十二年充出使日本大臣會遭疾未上居三
年補天津道旋調山東東海關道威海爲日人所據居民惶恐興銳建議勘地
分界主客互守閭市獲安堵其辦交涉獨條理精整事可許者一諾輒立辦遇
所不可則抗辯廣坐常服遠人遷長蘆鹽運使歷福建按察使布政使二十六
年擢撫江西拳匪畔作頑民相率不靖旬日間毀教堂數十掠教民財產積案
二千餘興銳効能疏防官十餘人限三月定讞議償卹費八十餘萬唯節餼以
彌罅漏和議成償款累百萬仍以節餼資挹注猶不足則取之士藥釐榷絕不

累民間毫末署南贛鎮申道發統軍驕蹇不奉法首劾罷之軍紀始肅興銳事
國藩久論治壹循軌跡重實行是時上方鄉新政迺以十事上曰開特科整學
校課官吏設銀行鑄銀幣維圉法立保險修農政講武備而歸本於用人爲安
內攘外之策言至深切旋移撫廣東二十九年署閩浙總督閩自軍興局所林
立有善後濟用勸捐稽覈稅釐諸目叢弊益甚興銳受事裁諸局所併爲財政
局事權始一於是釐定常備軍制汰虛冗節浮費而閩事稍稍振矣踰歲調署
兩江旋病卒諡勤恪

史念祖字繩之江蘇江都人刑部尙書致儼孫念祖幼穎異好讀兵家言踰冠
入貲爲通判從喬松年軍解蒙城圍有功僧格林沁戰歿曹州捻益熾皖北糜
沸念祖率師復英山克高圩雉河集者張洛行老巢也英翰守之陷重圍誓必
死念祖計出之而自駐其地期以二十日相見城下迺爲均糧法數卻寇營坐
堞上彈琵琶教士卒歌寇出視皆驚歎一日聞槍礮聲知援至與寇戰迺令居
民登陴守別選銳卒四千分道夾擊縱橫掃盪寇大潰謁英翰止踰二日云數

保道員同治六年移師鳳陽時捻酋李允謀窺廬鳳詣五河就李世忠念祖訶知之計說世忠縛以獻鑲送壽州寬之法晉按察使援滕縣既捷師還寇踰萬里其後迺掘深溝布機械陰徙去追騎多墜死人服其智略直東平賜號捷勇巴圖魯八年除山西按察使年未及三十也上慮其資名輕與直隸按察使張樹聲易官令晉國藩察覆稱念祖明爽磨厲當成大器宜稍緩任事遂解職留直差序十年左遷甘肅安肅道主關內外糧餉給食不乏征西軍倚以集事頗見賞於左宗棠光緒四年晉按察使多所平反理愈應鈞等殺降回轍忤宗棠意再被劾去十年起雲南按察使歷貴州調補雲南布政使時總督岑毓英督師出關需餽亟而巡撫張凱嵩與有郤念祖爲陳公私利害請以地丁錢漕受巡撫指麾釐金雜稅供總督兵餉復爲貨商款備糧械毓英德之密薦其賢二十一年授廣西巡撫桂故多匪至則選卒逐捕痛繩以法匪皆斂跡坐失察職罪罷免三十一年賞加副都統銜命赴奉天隨將軍趙爾巽治賑尋督三省鹽務及財政局奉省吏治不飭冒憲賾貨弊風相踵念祖佐爾巽力扶其弊獨苛

息煩歲入倍蓰并年奏績上嘉之晉記名副都統爾巽移蜀徐世昌代之又勅
罷宣統二年卒爾巽先後上其功復巡撫原官卹如制

論曰寇亂初平安民保土自以吏治爲先然非負文武幹用如寶楨諸人亦不
易言効也寶楨政尙威猛瀚章治參清靜而昌濬則不免于姑息樹聲有智略
秉璋稱綜覈榮光士杰皆善于用兵而疏于行政興銳重實效念祖好行權模
獨識議宏遠能見本原此十人中雖治績不必盡同其賢者至今猶絀人口庶
幾不失曾左之遺風歟